

L'Alphabet en Jèrriais par Frank Le Maistre

A pour Achocre tchi n'peut êpeler san nom;  
B un Bachouard tchi s'tchulbute dans l'valon;  
C pouor Chagorne, un dêrangi d'esprit;  
D un Dêcompteux, tchi n'peut pon s'êrdgethi;  
E nouos donne Emânue - j'en connais toute eune foule;  
F un Fliann'teux, vuldgaitement bailleux d'goule;  
G un Goumitre tchi fait dgiex r'pas par jour;  
H un Happe-la-leune tchi s'endort dans les chours;  
I fait Ingnot - y'en a hardi en Jèrri;  
J un Jingouais, tréjous prêt à cratchi;  
K ch'est du Grec (ou bein est-che dé l'Allemand?);  
L un grand Lobre, un bouistré d'fainiant;  
M êpelle Motcheux - janmais un moussieu;  
N un Nâdgeux tch'est mus a san tout seu;  
O est un Olÿmpe - j'en connais un tas;  
P un Piêrcheux tchi n'fait pon san travas;  
Q pouor Quétot - nou-s-en trouve à St Jean;  
R un Ritonneux j'les vèrrais tous d'bran;  
S nouos donne Snotcheux, un salope finni;  
T un Tout-s'mêle tchi s'met souvent l'dé dans l'yi;  
U un pour Usurpeux, comme les Angliais dans l'Ile;  
V un Vacâbond dans la prison en ville;  
X, Y et Z - les trais dreines lettres du lot.  
Né sont nulles populaithes dans nouot' vièr lingo!

